

Dumonda Rutishauser concernent la garanzia d'in dumber sufficient da plazzas da praticum per tgirunzas e tgirunzs en scolaziun

L'onn 2017 ha l'associaziun svizra da las tgirunzas e dals tgirunzs (AST) inoltrà l'iniziativa federala da tgira. Cun quella pretenda ella la garanzia d'in dumber sufficient da tgirunzas e da tgirunzs diplomads, en spezial en il sector terziar (tgirunza, tgirunz SSS/SAS). Actualmain vegnan scolads en quest sector mo 43 % dal basegn futur.

La cumissiun da sanadad dal cussegl naziunal ha elavurà en il fratep ina cuntraproposta indirecta tar l'iniziativa, ch'è en consultaziun dapi ils 20 da matg ed anc fin ils 14 d'avust. En questa cuntraproposta indirecta vegn constatada e sustegnida l'urgenza da l'iniziativa. La confederaziun ed ils chantuns duain procurar per avunda plazzas d'emprendissadi.

En ses rapport annual actual exprima il center da furmaziun per la sanadad ed ils fatgs socials (CSS) tranter auter grondas difficultads da chattar avunda plazzas da praticum per las tgirunzas ed ils tgirunzs en scolaziun. Durant lur scolaziun vegnan quellas e quels eventualmain en la situaziun ch'ellas ed els na san betg, sche, cura e nua ch'ellas ed els pon cuntinuar cun lur scolaziun. La gronda part da las instituziuns n'observan betg propi ils dumber prescrits en las incaricas da prestaziun da l'uffizi da sanadad.

La situaziun vegn a sa pegiurar d'ina vart perquai che las studentas ed ils students favuriseschan ospitals acuts sco lieus da scolaziun e da l'autra vart perquai che la purschida staziunara en ils ospitals vegn remplazzada en l'avegnir tras purschidas ambulantas. Sin questas staziuns stattan las pazientas ed ils pazients mo durant curt temp, uschia che la scolaziun da tgirunzas e tgirunzs n'è strusch pli pussaivla là.

Ina consequenza dal svilup «ambulant avant staziunar» vegn ad esser che las prestaziuns da l'ospital vegnan spustadas e remplazzadas tras la tgira transitorica en chasas da tgira e tras la spitex. Pervia da quai vegnan duvradas là dapli tgirunzas e tgirunzs ed oravant tut tgirunzas e tgirunzs meglier qualifitgads sco er plazzas d'emprendissadi correspundentas.

Fin ussa vegnan prescrits dumber da plazzas da praticum mo per ils ospitals, ma betg per ils secturs da la tgira da lunga durada, da la spitex e da la rehabilitaziun.

Las sutsegnadras ed ils sutsegnaders fan las suandantas dumondas en chaussa:

1. Co accumpogna la regenza las midadas e las sfidas actualas areguard il basegn da tgira?
2. Ha la regenza l'intenziun d'obligar en il futur er las instituziuns dals secturs da lunga durada, da la spitex e da la rehabilitaziun da metter a disposiziun plazzas da praticum per tgirunzas e tgirunzs en scolaziun?
3. Co garantisce la regenza che la qualitat da la scolaziun pratica corresponda vinavant en tut las instituziuns dal provediment da la sanadad a las prescripziuns federalas davart la scolaziun da tgirunzas e tgirunzs SSS?
4. Tge sustegn po il chantun porscher gist a las instituziuns pli pitschnas per ademplir l'incumbenza da scolaziun?

Puntraschigna, ils 14 da zercladur 2019

Rutishauser, Widmer-Spreiter (Cuira), Tomaschett-Berther (Trun), Atanes, Baselgia-Brunner, Bigliel, Brandenburger, Cahenzli-Philipp, Caviezel (Cuira), Clalüna, Crameri, Danuser, Deplazes (Cuira), Deplazes (Rabius), Ellemunter, Favre Accola, Gasser, Grass, Hofmann, Horrer, Kasper, Lamprecht, Locher Benguerel, Märchy-Caduff, Müller (Favugn), Natter, Niggli-Mathis (Grüsch), Noi-Togni, Papa, Paterlini, Perl, Preisig, Rettich, Rüegg, Sax, Schwärzel, Thöny, Wilhelm, Pajic